

Noticia
Transparente
di Gobierno

ISLA ONLINE

Diabierna 21 Juni 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4




Gabinete Wever-Croes



VUT TA HABRI PA EMPLEADONAN PUBLICO!

POR ENTREGA PETICION PA BAHU CU VUT TE CU DIA 5 DI AUGUSTUS 2024



Diahuebs mainta durante un conferencia di prensa di Gobierno, Prome Minister Evelyn Wever-Croes a elabora riba e tema di VUT, y kico en realidad un persona cu aplica pa esaki tin derecho riba dje. Prome Minister a indica cu e VUT a wordo habri dia 3 di Juni 2024 y lo sera 5 di Augustus 2024. Empleadonan publico cu tin deseo di bandona servicio di gobierno y ricibi un entrada pa un maximo di 3 aña por aplica pa bin na remarke pa baha cu VUT. E peticion mester wordo entrega prome cu dia 5 di Augustus, na unda tambe mester indica ki tempo, prome cu 1 di mei 2025, lo desea di bandona servicio.

KICO UN PERSONA LO HAYA DURANTE E 3 AÑANAN DI VUT?

Empleadonan cu tin mas di 10 aña den servicio, ta haya un total di 3 aña di entrada. Pa esnan cu tin menos di 10 aña, VUT tambe lo ta disponibel, pero e total di aña pa haya entrada ta cambia. Pa informacion riba esaki por tuma contacto cu Departamento di Recurso Humano (DRH).

SUMA DI E VUT UITKERING

Pa esnan cu lo haya entrada pa 3 aña, lo haya e prome aña 90%, e di dos aña 80%, y di tres aña 70% di e ultimo salario cu e persona tabata tin prome cu el a bandona servicio di gobierno. Gobierno tambe lo tuma na cuenta, e "vakantie uitkering", e toelagenan existente y e premie di AOV/AWW y AZV.



ACUERDONAN CU TA KEDA VIGENTE

Durante cu e persona ta ricibiendo su VUT, ta keda na remarke gratificacion pa añanan di servicio, cuido medico, pensioen ta sigui core, y den caso di morto di e persona, e uitkeringnan cu normalmente lo wordo duna, lo wordo duna tambe.

ACUERDONAN CU LO CANCELA NA MOMENTO DI BAHU CU VUT

Durante e temporada di VUT, e persona no lo tin derecho mas na aumento di salario y/of periodiek, dianan di vakantie y/of dianan di ATV, y indexering. Tambe si un persona aplica pa baha cu VUT, e persona no lo por drenta den ningun forma, servicio di gobierno, ni lo por traha como un "publieke rechtspersoon", pa e siguiente 5 añanan.

"Mi kier a enfatisa cu tin un procedura pa esnan interesa den aplica pa VUT, y esaki no ta den man di ningun minister. Unabes e peticion drenta e lo wordo evalua pa un comision cu ta consisti di e director di e departamento bou kende e persona ta traha, y e director di e compania. E decision pa honra e peticion aki lo wordo tuma, teniendo na cuenta cu si e departamento lo por sigui draai eficazmente sin e vacatura aki, mirando cu e posicion di e persona cu bay cu VUT, no lo por reemplasa" Prome Minister a splica.

Pa cualkier informacion tocante VUT, por tuma contacto cu DRH na 522-9999 of email vut@drh.gov.aw. Tambe lo por haya informacion riba e portal di HR.

NOMBRACION DI DRS. MARION AGUNBERO COMO MIEMBRO DI ARUBA DEN E COLEGIO DI SUPERVISION FINANCIERO PA ARUBA

Dia 21 di juni 2024, Consejo di Minister di Reino a aproba e proposicion di Aruba pa nombra Drs. Marion Agunbero como miembro di Aruba den e Colegio di Supervision Financiero pa Aruba (CAft) entrante 1 di augustus 2024.

Señor Agunbero ta tuma over di Señora Helen van der Wal cu despues di 2 termino ya no por wordo reeligi. Señor Agunbero tin experiencia amplio den e sector financiero y a ocupa diferente funcionnan entre otro na Banco Central, como manager di seccion di supervision, y como Director di Departamento di Finanzas. Tambe Señor Agunbero tawata Director Ehecutivo di e Fondo di Pensioen den e sector di turismo di Aruba y a ocupa diferente posicionnan na Caribbean Mercantile Bank N.V., entre otro como Assistant Managing Director Retail Products.

Actualmente e ta miembro di e Consejo di Comisario di Caribbean Mercantile Bank N.V. y tambe miembro di e Consejo Consultativo di Aruba. Di akinan e lo tuma su retiro pa asumi e cargo nobo como miembro di Aruba den CAft.

Gobierno di Aruba ta gradici señora Van der Wal pa e bon trabou cu el a desplega como miembro di Aruba den CAft durante e añanan y ta desea señor Agunbero tur clase di exito.



VUT 2024

Voor vragen of een specificatie/calculatie of afspraak maken:

Telefoonnummer: 522-9999

E-mail: vut@drh.gov.aw

**Informatie ook verkrijgbaar:
HR portaal**

Volg ons Facebook pagina voor de laatste ontwikkelingen betreffende de VUT.

Prome Minister Evelyn Wever-Croes:

E COMPROMISO DI GOBIERNO TA PA SIGUI TRECE STABILIDAD Y PROSPERIDAD DEN TUR HOGAR NA ARUBA

Aprobacion di Parlamento di e Presupuesto Supletorio 2024
ta di suma importancia



Prome Minister Evelyn Wever-Croes na clausura di e Conferencia di Prensa di 20 di juni, a elabora riba e compromiso cu Gobierno di Aruba tin cu e pueblo.

ECONOMIA DEN PLENO RECUPERACION

Prome Minister a indica cu ya pa un tempo caba Aruba ta den pleno recuperacion. Apesar cu e pandemia a afecta Aruba su economia considerablemente, Gobierno a compromete su mes pa saca Aruba for di e crisis y a cumpli. E siguiente paso tawata pa stabilisa e pais, cual tambe Gobierno a cumpli cun'e.

TURISMO DEN CRECEMENTO CONSTANTE

Turismo ta bayendo enormemente bon y basa riba cifranan cu Minister di Turismo Dangui Oduber a presenta ultimamente, luna di mei tawata otro luna hopi positivo. Danki na esey e economia di Aruba ta creciendo ya pa tres aña consecutivo na un forma abrumador despues di pandemia.

DESEMPLEO A BAHAMAS CONSIDERABLEMENTE

Cremento di economia ta crea cuponan di empleo y cu esaki e desempleo na Aruba a baha na e cifra di mas abou den 20 aña. Esaki ta debi tambe na e bon trabou y esfuersonan haci door di sector concerni, manera e job fair cu ta wordo organisa cada aña y sigur e programa di Enseñansa pa Empleo cu ta duna cursonan y asina prepara e trahadonan adecuadamente. Tur esaki ta yuda cu mas hende por yega na un trabou y ta bon prepara.

OPERATION COMMAND CENTER

E seguridad di pais Aruba ainda ta na prome luga den e region. E apertura dia 21 di juni di e Operation Command Center na Savaneta lo bay yuda mas ainda pa tene Aruba sigur.

IMPORTANCIA APROBACION PRESUPUESTO SUPLETORIO 2024

Gobierno a compromete su mes cu e aña aki e prosperidad lo wordo sinti den cada skina di nos pais, den e cartera di cada ciudadano y esey tambe Gobierno ta bin ta haciendo. E Presupuesto Supletorio 2024 lo wordo trata e simanan venidero. Si Parlamento aproba esaki, lo mira empleadonan publico y di enseñansa bay dilanti den salario, pensionadonan cu ta haya reparatie toeslag lo tin aumento di entrada y trahadonan di fundacionnan subsidia door di Gobierno lo bay dilanti den salario. Mescos pa esnan cu ta haya gehandicaptent uitkering lo bay dilanti den entrada y trahadonan den sector priva cu un salario di menos di 2500fl pa luna y ta haya reparatietoeslag tambe lo tin aumento den nan entrada.

“Tur esaki ta parti di e estabilidad y prosperidad cu nos Gobierno ta busca pa Aruba, pa cada ciudadano riba e isla aki. Esey ta e compromiso cu nos a haci y nos ta cumpliendo. Ainda nos no ta caminda cu nos kier ta pero nos ta logrando si”,
Prome Minister a accentua.



MINISTER MADURO DI FINANSA TA AMPLIA RIBA SU BIAHE RECIENTE PA MERCA PA REUNI CU INVERSIONISTANAN RIBA E MERCADO INTERNACIONAL DI CAPITAL

Den e biahe reciente pa Merca, Minister Maduro di Finansa hunto cu su ekipo financiero, a reuni cu inversionistanan riba e mercado internacional di capital, pa asina por prepara pa emision di bono internacional di Aruba pa por refinancia e debe di Aruba cu ta madura den aña 2024. Den e proceso aki Minister Maduro ta wordo asisiti pa e banconan internacional Santander y Citi.

E mandatario a reuni cu 12 inversionista institucional den 5 diferente ciudad na Merca, den cual ta figura companianan di seguro, fondonan di inversion, fondonan di pensioen y companianan cu ta maneha capital grandi. Nan tur ta inversionista grandi y conoci riba e mercado internacional di capital cu a muestra hopi interes pa inverti den bononan internacional di Aruba.

Minister Maduro y su ekipo a percura pa duna un presentacion amplio di e ultimo desaroyo economico y financiero di Aruba, den cual a brinda informacion di e recuperacion economico y financiero, e maneho di debe, e reformanan cu ta tumando luga den cuadro di e Landspakket, e plan di Aruba pa atende cu retonan financiero di cambio climatico, informacion riba e inversionnan cu ta tuma luga y ta duna bista riba e rendimiento financiero di e companianan estatal Aruba.

Minister Maduro di Finansa ta enfatisa cu e bishita aki na inversionistanan institucional na Merca, ta den cuadro di e maneho di debe di Aruba den cual ta refinancia debenan cu ta madura den aña 2024. Dus e emision cu Aruba lo haci proximamente no ta pa crece debe, sino pa refinancia esaki. E dede di Aruba mes lo bolbe baha den aña 2024, ya cu e placa di e surplus den presupuesto 2024 tambe ta bay pa paga e debe di nos Pais.



E mandatario ta satisfecho cu e resultado di e biahe. E storia di Aruba a wordo bon ricibi y tin interes pa e emision. Awo lo sigui pa e proximo paso, cu ta haya autorisacion di Consejo di Minister di Reino basa riba articulo 29 di Statuut di Reino Hulandes, pa asina por inicia e transaccionnan.

Minister Xiomara Maduro



Minister Geoffrey Wever:

SEMINARIO DI "PODER FINANCIERO: E CAMINDA PA BO CAS" DIASABRA AWO

Diasabra binidero, 22 di juni 2024, lo tuma luga e seminario "Poder Financiero: E Caminda pa bo Cas". E seminario aki ta un colaboracion entre Fundacion Plan di Bida, Bold Properties y e Ministerio di Asuntonan Economico.

Lo enfoca riba e proceso y rekisitonan pa yega na un cas na Aruba, 'un topico sumamente importante pa empoderacion financiero di nos comunidad', segun minister Geoffrey Wever, kende tambe lo ta presente durante e presentacion. E seminario lo tuma luga na Renaissance Convention Center, cuminsando pa 8:30 di mainta.

E seminario aki tin como meta pa empodera nos comunidad cu informacion valioso referente e derecho cu nos tin di por bira doño di nos mesun cas. Conocemento ta necesario pa maneha e rekisitonan efectivamente pa por ehempel; cualifica pa un prestamo hipotecario a base di rekisitonan comun. Tambe tin otro costonan mara na rekisitonan cu mester ta consciente di nan, asina un persona por presupuesta y planifica miho pa su futuro inversion.

Minister Geoffrey Wever ta contento di por a contribui pa por haci e seminario aki pa por segura cu e ta gratis. E ta toca un tema asina importante; educacion financiero. Esaki ta un prioridad di maneho di minister Wever, y e Ministerio di Asuntonan Economico ta haci diferente actividadnan dirigi pa stimula pa nos hendenan ta mas consciente ora di tuma decision financiero na nan beneficio.

E seminario lo conta cu e presencia di diferente oradornan distingui, incluyendo notarionan Theodore Johnson y Ralph Yarzagaray, analista financiero, realtors, y un representante di un banco local cu lo splica e proceso pa aplica pa un hipoteca (mortgage). Tambe lo tin un representante di DIP cu por brinda informacion di parti di gobierno riba rekisitonan, gastonan annual, y zonificacion.


Nos ta kere cu informa y educa nos comunidad ta esencial pa empodera nan pa realisa nan soño di por logra yega na nan propio cas. "Poder Financiero: E Caminda pa bo Cas" lo ta un experiencia valioso pa cualkier persona y famia cu lo contribui pa cambio den bo bida.





MINISTER ENDY CROES A PRESENCIA E SEGUNDO EDICION DI E COMPETENCIA NACIONAL DI GIMNASIA ARTISTICO

Dia 7 pa 9 di juni, a tuma luga e di dos (2) edicion di e competencia Nacional di Gimnasia Artistico organisa pa Federacion Gymnastico Arubano (FGA). Un fin di siman di competencia cu a conta cu participacion di mas di 125 gimnasta di Aruba y Curaçao cu a competi dilanti un panel di hues internacional. Dos dia di competencia, unda e hobennan a competi riba nivel: pre A, B, C, nivel 1, 2, 3, 4, 5, 6, y 7 y nivel junior FIG & FIG.

E atletanan a presenta un show espectacular y a duna e miho di nan mes den e competencia internacional aki. Minister Endy Croes tabata presente pa duna sosten na e hobennan cu a comparti nan talentonan excepcional den e disciplina aki. Pabien na tur atleta nos ta super orguyoso di boso tur! Pa conclui, Minister Endy Croes ta felicita Federacion Gymnastico Arubano cu a organisa e gran competencia aki. Ademá, ta aplaudi e tremendo trabou di e club-, mayor- y atletanan. Pabien na e ganadonan di cada categoria. Cu deseo, dedicacion, determinacion y disciplina a logra! 



MINISTER THIJSSEN NA E ULTIMO RMR DI GABINETE RUTTE IV



Awe Gabinete Rutte IV a tene su ultimo Reunion di Consejo di Reino (RMR), mirando cu un Gobierno nobo di Hulanda ta den pleno formacion y e huramentacion door di Rey Willem Alexander di e Ministernan y Secretarionan di Estado ta poni pa tuma lugar 2 di juli benidero.

Despues di a gradici e Ministernan y Secretarionan di Estado pa e cooperacion cu nos pais, e Minister Thijsen a dirigi den un mensahe personal na Mark Rutte como presidente di RMR.

Akinan e mandatario a bisa cu ela experiencia Rutte di tempo cu e tabata lider di fraccion di VVD den Tweede Kamer, tambe durante e proceso di desmantelacion di Antia y despues cu ela bira Prome Minister. Minister Thijsen: 'Mi a experiencia tur esaki cune y tabata tin e privilegio pa a traha cune e ultimo dos añanan como Minister Plenipotenciario. Den nomber di Gobierno y pueblo di Aruba mi a felicita y gradici y alabes desea su persona tur clase di exito den su funcion nobo como Secretario General di NATO. Cu ta un funcion cu hopi reto, mirando e circunstancianan den e mundo actual; cu e ta e persona cu nan a duna tur confiansa y sosten pa logra cu tur cos bai bon awor. Un trabao hopi pisa, pero nos tin confiansa den Mark Rutte.'

Minister Thijsen tambe tabata tin palabranan di gradicimento special pa Secretario di Estado Alexandra van Huffelen. 'Mi a experiencia hopi Secretario di Estado y hopi Minister di Asuntonan di Reino, pero Van Huffelen tabata e unico cu a bisa hopi cla y publicamente durante di e firmamento di e "Onderlinde Regeling Samenwerking en Hervormingen", cu mester a bira un Onderlinge Regeling y no un Ley di Reino (Rijkswet), cu e tin confiansa total den e mandatarionan di e paisnan. Prensa Hulandes tabata critico riba esaki, pero Van Huffelen a keda riba su punto di bista,' asina e mandatario a bisa.

Minister Thijsen a bolbe ripiti cu Aruba ta kere den un Reino fuerte, pero cu respet pa otro, duna otro sosten, duna nos loke ta parti di nos tambe. Sigur, segun sr. Thijsen, cu e aña aki ta celebra 70 aña di Statuut. 'Unda cu mester constata cu nos no ta den 1954 mas, pero ta 2024. Nos ta madura y nos mester por tin mas participacion real den e desaroyo di Reino,' tabata palabranan di Minister Plenipotenciario di Aruba Ady Thijsen. Na final di e conferencia di prensa, periodista di Telaaruba Ryan Oduber a haci entrega di un regalo na Secretario di Estado Alexandra van Huffelen como graditud y aprecio pa su cooperacion cu prensa Caribense. ■

MINISTER THIJSSEN TIN CONFIANSA RIBA CONTINUIDAD DEN MANEHO



Mirando cu Hulanda proximamente lo tin un Gobierno nobo y cu tambe lo tin un Secretario di Estado nobo pa Relacionnan den Reino, Minister Plenipotenciario mr. Ady Thijsen a duna comentario riba e desaroyo aki na final di reunion di Consejo di Minister di Reino (RMR). Den esaki e mandatario a bisa cu indicacion ta muestra cu e Secretario di Estado nobo lo kier continua cu loke nan a haci caba den pasado. ‘Esey ta muestra bon. Cada candidato tin nan experiencia. Nos lo mester duna nan chens pa goberna. Aruba ta traha cu tur partido cu tin. Nos sa cu nos ta hacienda un bon trabao y nos sa unda nos ta para,’ segun Minister Thijsen.

Riba pregunta di prensa tocante e punto di bista di PVV pa loke ta e parti Caribense di Reino, Minister Thijsen a bisa cu en berdad cierto comentarionan scerpi a wordo haci den pasado y mester lage te ey. ‘Nos mester sali di e punto di bista cu nos ta den un otro desaroyo y bo mester respeta e democracia; e resultado di eleccion na Hulanda. Ami ta di 2005 y mi a experiencia diferente politiconan Hulandes, tambe di PVV. No ta awor nan a cuminsa, pero tin hopi aña den politica Hulandes. Nan ta hopi scerpi, pero e “bottom line” di nan ta esaki. Nan ta bisabo cu nan no kier pa e paisnan den Reino bin bati na

porta cada biah pa placa y nan no kier pa e paisnan ta keda sin tuma nan responsabilidad. Ami por papia pa Aruba, cu ta un pais cu semper a carga su responsabilidad; Aruba ta un pais cu si mester, semper a fia placa riba mercado financiero internacional. E unico momento cu Aruba a fia placa di Hulanda, ta durante di e pandemia pa nos por a sobrevivi. Ami ta kere cu nos mester mira padilanti y mi te kere den e palabranan cu e Hulandesnan mes ta usa hopi cu ta continuidad. Y manera Secretario di Estado Van Huffelen a bisa cu e ta sali for di punto di bista cu tin continuidad di loke nos a bin ta haci,’ tabata palabranan di Minister Thijsen.

Finalmente Minister Thijsen ta kere cu ta bon pa tin hende cu hopi experiencia den funcionnan clave, pasobra awor esaki ta nesesario. Segun sr. Thijsen casi tur Minister y Secretario di Estadonan ta nobo y e tin un bentaha cu nos tin e experiencia pa nos por sigi fortifica nos paisnan den Reino. Tambe Minister Thijsen a muestra riba e posibel cambionan cu ta bai bin den Reino, cu eleccion atrobe na Sint Maarten den luna di Augustus, Curaçao ta bai vota na Maart 2025 y Aruba tin eleccion na Juni 2025.



Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

2024

AÑA DI STABILIDAD Y PROSPERIDAD